



გ ა ნ რ ი ნ ე ბ ა

(საქართველოს სახელით)

03 მაისი, 2011 წელი

ქ. თბილისი

თბილისის სააპელაციო სასამართლოს ადმინისტრაციულ საქმეთა პალატა

მოსამართლე – მანანა ჩოხელი

აპელანტი – ბადრი მსხილაძე

მოწინააღმდეგე მხარე – საქართველოს იუსტიციის სამინისტროს ეროვნული სააგენტოს თბილისის სააღსრულებო ბიურო

მესამე პირები – ქეთევან ადგიშვილი, თამაზ ხუციშვილი, მენაშენეთა ამხანაგობა „ვერის უბანი“, ნანა ასანიშვილი, ლევან ასანიშვილი, მარო დავითულიანი, აწ გარდაცვლილი ლუიზა კობახიძე

დავის საგანი – აუქციონის შედეგების ბათილად ცნობა

გასაჩივრებული გადაწყვეტილება – თბილისის საქალაქო სასამართლოს ადმინისტრაციულ საქმეთა კოლეგიის 2007 წლის 05 ოქტომბრის გადაწყვეტილება

აპელანტის მოთხოვნა – გადაწყვეტილების გაუქმება და ახალი გადაწყვეტილების მიღებით სასარჩელო მოთხოვნის დაკმაყოფილება

ზეპირი მოსმენის გარეშე განიხილა სასამართლო შეტყობინების საჯაროდ გავრცელების საკითხი და

გ ა მ თ ა რ კ ვ ი ა :

თბილისის საქალაქო სასამართლოს ადმინისტრაციულ საქმეთა კოლეგიის 2007 წლის 05 ოქტომბრის გადაწყვეტილებით ბადრი მსხილაძის სასარჩელო მოთხოვნა არ დაკმაყოფილდა. გადაწყვეტილება სააპელაციო საჩივრით გაასაჩივრა მოსარჩელემ და მოითხოვა გადაწყვეტილების გაუქმება და ახალი გადაწყვეტილების მიღებით სასარჩელო მოთხოვნის დაკმაყოფილება.

თბილისის სააპელაციო სასამართლოს 2008 წლის 11 ივლისის საოქმო განჩინებით სააპელაციო საჩივრის განხილვა შეჩერდა მესამე პირის – ლუიზა კობახიძის გარდაცვალების გამო, მისი უფლებამონაცვლის დადგენამდე. თბილისის სააპელაციო სასამართლოს ადმინისტრაციულ საქმეთა პალატის 2011 წლის 04 აპრილის განჩინებით საქმეზე განახლდა სამართალწარმოება და სააპელაციო საჩივრის ზეპირი განხილვა დაინიშნა 2011 წლის 20 აპრილს 14:00 საათზე, რის შემდეგაც საქმის განხილვა გადაიდო 2011 წლის 18 მაისს 15:00 საათისთვის.

საქმის მასალების გაცნობის შედეგად, სააპელაციო პალატა მიიჩნევს, რომ მესამე პირის – აწ გარდაცვლილი ლუიზა კობახიძის ოჯახის წევრებისთვის (მემკვიდრეებისთვის) სასამართლო სხდომის დღე ცნობილი უნდა გახდეს სასამართლო შეტყობინების საჯაროდ გავრცელების საშუალებით, შემდეგ გარემოებათა გამო:

დადგენილია, რომ თბილისის სააპელაციო სასამართლოს მიერ 04.04.2011 წელს ლუიზა კობახიძის ოჯახის წევრებთან გაიგზავნა შეტყობინება სააპელაციო საჩივრის განხილვის თარიღის შესახებ და წერილი, რომლითაც დაევალა მათ, ეცნობებინათ სასამართლოსთვის, ვინ წარმოადგენს დღეის მდგომარეობით ლუიზა კობახიძის მემკვიდრეებს. იგივე შინაარსის წერილი გაიგზავნა ადრესატთან განმეორებით 11.04.2011 წელს და 20.04.2011 წელს სხვადასხვა მისამართებზე, მაგრამ არ ჩაბარდა არც ერთხელ, ფოსტის თანამშრომლის მხრიდან მოუძიებლობის გამო.

საქართველოს ადმინისტრაციული საპროცესო კოდექსის პირველი მუხლის მე-2 ნაწილის თანახმად, თუ ამ კოდექსით სხვა რამ არ არის დადგენილი ადმინისტრაციულ სამართალწარმოებაში გამოიყენება სამოქალაქო საპროცესო კოდექსის დებულებანი.

საქართველოს სამოქალაქო საპროცესო კოდექსის 78.1-ე მუხლის თანახმად, თუ მხარის ადგილსამყოფელი უცნობია ან მისთვის სასამართლო უწყების ჩაბარება სხვაგვარად ვერ ხერხდება, სასამართლო უფლებამოსილია გამოიტანოს განჩინება სასამართლო შეტყობინების საჯაროდ გავრცელების შესახებ. სასამართლო შეტყობინება საჯაროდ ვრცელდება შესაბამისი სასამართლოს შენობაში თვალსაჩინო ადგილზე ან **ვებგვერდზე განთავსებით**, ან დაინტერესებული მხარის მოთხოვნის შემთხვევაში, მისივე ხარჯებით იმ გაზეთში, რომელიც მასობრივადაა გავრცელებული მხარის საცხოვრებელი ადგილის შესაბამის ადმინისტრაციულ-ტერიტორიულ ერთეულში, ან ინფორმაციის სხვა საშუალებებში გამოქვეყნებით.

თბილისის სააპელაციო სასამართლომ იმსჯელა საქმის სრულყოფილად, კანონმდებლობით დადგენილ უმოკლეს ვადაში განხილვისა და გაჭიანურების თავიდან აცილების გარემოებებზე, გაითვალისწინა საქართველოს სამოქალაქო საპროცესო კოდექსის 78-ე მუხლით განსაზღვრული დანაწესი, რის შედეგადაც მიიჩნევს, რომ მართლზომიერია საქმეში მონაწილე მესამე პირის – აწ გარდაცვლილი ლუიზა კობახიძის მემკვიდრეებს სასამართლო სხდომის დღის შესახებ ეცნობოთ სასამართლოს ვებგვერდზე განთავსებით.

სააპელაციო პალატამ იხელმძღვანელა საქართველოს ადმინისტრაციული საპროცესო კოდექსის პირველი, საქართველოს სამოქალაქო საპროცესო კოდექსის 372-ე, 78-ე, მე-200 და 284-285-ე მუხლებით და

და ა დ გ ი ნ ა:

1. ლუიზა კობახიძის მემკვიდრეებს სასამართლო შეტყობინების საჯაროდ გავრცელების საშუალებით ეცნობოთ, რომ ბადრი მსხილაძის სააპელაციო საჩივრის ზეპირი განხილვა თბილისის სააპელაციო სასამართლოში დაინიშნულია 2011 წლის 18 მაისს 15:00 საათზე, სხდომის დარბაზი №14, მისამართი – თბილისი, გრ. რობაქიძის გამზ. №7ა;
2. ლუიზა კობახიძის მემკვიდრეებს ეცნობოთ, რომ ისინი დაბარებული არიან სასამართლოს მთავარ სხდომაზე საქმეში მესამე პირების სახით მონაწილეობის მისაღებად;
3. სასამართლო შეტყობინება განთავსდეს თბილისის სააპელაციო სასამართლოს ვებგვერდზე (www.tbappeal.court.gov.ge);
4. ლუიზა კობახიძის მემკვიდრეებს ეცნობოთ, რომ მათთვის სასამართლო უწყება ჩაბარებულად ჩაითვლება საჯარო შეტყობინების სასამართლოს ვებგვერდზე განთავსებიდან მე-7 დღეს;
5. განჩინება არ გასაჩივრდება.

მოსამართლე

მანანა ჩოხელი